



11  
1774  
5



藏書紀事詩卷三

長洲葉昌熾

煙波四面閣玲瓏第一登臨是太沖三百年來無恙在買舟

欲訪甬句東 范欽堯卿 從子大澈子宣

明詩綜小傳范欽字堯卿一字安卿鄞縣人嘉靖壬辰進士累官兵部右侍郎有天一閣集 茶餘客話欽號東明喜購舊本兩浙藏書以天一閣為第一 全祖望天一閣藏書記天一閣肇始於明嘉靖閒而閣中之書不自嘉靖始固城西豐氏萬卷樓舊物也豐道生晚得心疾潦倒於書淫墨癖之中喪失其家殆盡而樓上之書凡宋槧與寫本為門生輩竊去者幾十之六其後又遭大火所存無幾范侍郎欽素好購書先時嘗從道生鈔書且求其作藏書



1774  
5

記至是以其幸存之餘歸於是閣又稍從弇州互鈔以增益之雖未能復豐氏之舊然亦雄視浙東焉吾聞侍郎二子方析產時以為書不可分乃別出萬金欲書者受書否則受金其次子欣然受金而去今金已盡而書尚存其優何如也 又天一閣碑日記是閣之書明人無過而問者康熙初黃先生太冲始破例登之於是崑山徐尚書健庵聞而來鈔其後登斯閣者萬徵君季野馮處士南耕而海甯陳詹事廣陵纂賦彙亦嘗求之閣中 又云閣之初建也鑿一池於其下環植竹木然尚未署名也及搜碑版忽得吳道士龍虎山天一池石刻元揭文安公所書而有記於其陰大喜以為適與是閣鑿池之意相合因即移以名

閣 東齋脞語范氏立法盡善其書不借人不出閣子孫有志者就閣讀之故無散佚之患其閣四面皆水讀者不許夜登不嗜烟艸故永無火厄迄今三百年雖十七四五然所存尚可觀也 阮文達天一閣書目序此閣構於月湖之西宅之東墻圍周迴林木蔭翳閣前略有池石與闌闌相遠寬閑靜閱不使持烟火者入其中其能久一也司馬歿後封閉甚嚴繼乃子孫相約為例凡閣廚鎖鑰分房掌之禁以書下閣梯非各房子孫齊至不開鎖子孫無故開門入閣者罰不與祭三次私領親友入閣及擅開廚者罰不與祭一年擅將書借出者罰不與祭三年因而典鬻者逐不與祭其例嚴密如此所以能久二也 又定香亭

筆談云余兩登此閣閣不甚大地甚卑溼而列置書乾燥無蠹蝕是可異也 鄭梁訥庵范公傳訥庵范公諱大澈字子宣又字子靜從仲父兵部右侍郎欽游京師官鴻臚寺序班使琉球遼東朝鮮等處璽書七下進秩二品月俸所入輒以聚書聞人有鈔本多方借之長安旅中嘗雇善書者謄寫多至二三十年年六十七致仕築室郡城西郊繙經閱史品畫評書者垂二十年萬曆庚戌九月八日卒春秋八十有七所著有灌園叢談卧雲山房遺藁 又爲陳怡庭壽范簡巖七十序鄞邑好古藏書之家豐氏而後推范氏然人知司馬東明公之所藏特富而不知鴻臚訥庵公爲其猶子其所藏不至如南北阮也百餘年以來故

家阜隸華屋山邱司馬天一閣之書名天下然至論其籤題裝輯奕世如新則鴻臚手澤擬諸司馬正如石崇之於王愷矣 昌熾案天一閣書目所列范氏諸印有四明范氏書記甬東范氏家藏圖書古司馬氏萬古同心之學東明山人東明草堂七十二峯一吾廬和鳴國家之盛司馬印也范子受氏靜思齋崑崙山人碧沁書堂西郭草堂范伯子子受少明清甯宇宙中人皆司馬之子少明印也 又案天祿琳琅初學記有范大澈印子宣父西園生平樂事滄洲外史藝文類聚有范氏子宣明州范生卧雲寶墨齋四明真逸南海釣者典屬國印典客侍從之臣句章灌園交對此展玩咀嚼自爲葛天之民金峩玉几丹山赤水

諸朱記皆子宣印也丹山赤水爲剡源之第五曲亦名三石邨全謝山湖語所云獨剡源之五曲忽孕爲丹霞之古文迅流成雷來歸于三石之邨是其地也

門生當路彎弧奪里媪沿門托鉢詢但見安亭金寶氣卿雲頭上覆輪囷歸有光熙甫妻王氏

明史歸有光字熙甫崑山人嘉靖十九年舉鄉試四十四年始成進士授長興知縣隆慶四年大學士高拱趙貞吉引爲南京太僕丞震川集世美堂後記余妻之曾大父王翁致謙成化初築室百楹於安亭江上扁曰世美嘉靖中曾孫某以通官物鬻於人余適讀書堂中吾妻曰君在不可使人頓有黍離之悲余亦自愛其居閒靚可以避俗

囂也迺質金以償鬻者安亭俗皆窳而田惡人爭以不利阻余余稱孫叔敖請寢邱韓獻子遷新田之語以爲言吾妻以余好書故家有零落篇牘輒令里媪訪求遂置書無慮數千卷又題金石錄後余少見此書於吳純甫家至是始從友人周思仁借鈔復借葉文莊公家藏本校之觀李易安所稱其一生辛勤之力頃刻雲散可以爲後世之戒然余生平無他嗜好獨好書以爲適吾性焉耳不能爲後日計也池北偶談歸熙甫與門生王子敬一帖云東坡易書二傳曾求魏八不與此君殊俗惡乞爲書求之畏公作科道不敢祕也借書雅人事乃亦徇勢力如此且在嘉靖閒世風已爾矣黃宗羲天一閣藏書記歸震川曰

書之所聚當有如金寶之氣卿雲輪囷覆護其上 鐵琴  
銅劍樓書目朱刻鄧析子有朱文方印曰世美堂印又有  
長方朱文印曰魏國文正公二十二代女疑爲震川先生  
配王夫人印記震川居安亭夫人嘗屬里媪訪求古書也  
昌熾案天祿琳琅明刻文選有世美堂琅琊王氏珍玩一  
往有深情諸朱記亦王夫人印也

整齊舊聞汲放失左右文武儒裨編好屬女孫收脚本一  
圈一擲莫忘筌 唐順之應德 唐宇昭 唐仁良士

吳偉業汲古閣歌嘉隆以後藏書家天下昆陵與琅邪整  
齊舊聞汲放失後來好事知誰及注明史唐順之傳順之  
字應德武進人盡取古今載籍剖裂補綴區分部居爲左

右文武儒裨六編行於世 彭文勤公知聖道齋讀書跋  
余獲見季滄葦所藏正德年初印盡忠錄尙無補錄二卷  
有滄葦手跋其夫人唐氏乃昆陵孔明之女荆川四世孫  
也以是見貽朱墨皆荆川筆云細閱書中絕無批評但有  
圈抹不能得其讀書之意既取荆川右編勘之圈者皆入  
右編抹者節去始知卽其纂右編時脚本滄葦之言益信  
拜經樓藏書題跋記唐字昭字孔明家富藏書毛斧季  
嘗聞其有宋槧趙孟奎分類唐詩一百卷輾轉借之而未  
得 天祿琳琅續編宋刻孝經有唐字朱文圓印又晉昌  
祕笈記唐仁良士昆陵唐良士藏書四印 楹書隅錄北  
宋本孟東野集有昆陵唐良士藏書于辰良士三印

練市高樓擁白華姑存世學爲專家將軍未奏崖山績且種  
東陵五色瓜

茅坤順甫

孫元儀止生

湖錄茅坤字順甫號鹿門歸安人明嘉靖戊戌進士大名  
副使以事鐫職歸作島人傳三益先生傳以見志著有白  
華樓橐玉芝山房橐年九十卒子翁積國縉維國縉子元  
儀字止生號石民佐孫承宗行師歷官提督大將軍旋以  
兵譁下獄遣戍漳浦邊事急請募死士勤王爲庸奸所忌  
悲憤縱酒而卒 吳興藏書錄茅坤白華樓書目下引湖  
錄云鹿門茅先生藏書甲海內練市新構書樓凡數十間  
至於充棟不能容其孫大將軍止生編爲九學十部目自  
述云九學者一曰經學二曰史學三曰文學四曰說學五

曰小學六曰兵學七曰類學八曰數學九曰外學十部者  
卽九學之部而加以世學世學不可以示來世然時王之  
制吾先人以茲名於世吾敢忽諸其後攜至白門遭國變  
散去

涼風穿牖毫頻禿白日緣梯燭自燒等是人閒希有本虞山

不贈贈清瑤

錢穀叔寶

子允治功甫

列朝詩集小傳錢穀字叔寶少孤貧游文待詔門下日取  
架上書讀之以其餘功點染水墨得沈氏之法晚葺故廬  
讀書其中聞有異書雖病必強起匍匐請觀手自鈔寫幾  
於充棟窮日夜校勘至老不衰子允治酷似其父年八十  
餘隆冬病瘍映日鈔書薄暮不止功甫歿無子其遺書皆

散去自是吳中文獻無可訪問先輩讀書種子絕矣 明  
詩綜小傳允治初名府後以字行更字功甫有少室先生  
集 明畫錄穀子允治字功甫序字次甫亦善山水 靜  
志居詩話叔寶晚葺敝廬曰懸罄室王元美爲賦詩所謂  
空梁願受落月色北窗靜埃涼風眠者也昌熾案劉子威  
集有懸罄室記言錢君少學於文徵仲先生爲題其室曰  
懸罄言能貧也據此則竹垞晚葺之說未審矣 讀書敏  
求記功甫老屋三間藏書充棟白日檢書必秉燭緣梯上  
下所藏多人間罕見之本 又也是園書目序吳門錢功  
甫高士也牧翁釋褐後卽與之交一日語公吾老矣藏書  
多人間未有本子公明日來當作蔡邕之贈我欲閱轉就

公借他年屬纊時公與我料理身後事牧翁喜甚質明往  
其意色閔默已不肯踐宿諾矣嗟乎讀書種子習氣未除  
斤斤護惜非獨一功甫然也功甫有李師師外傳一卷卽  
荃翁云道君在五國城所作從權場中來者功甫歿此書  
不知散落何處今雖懸百金購求豈可復見 李果徐瑤  
圃畫雲間往哲遺像跋吾吳先賢像爲錢叔寶手筆功甫  
欲歸之文文肅公有贊郎以厚利願交於功甫功甫不可  
文肅感其意至質其家藏宋槧史記酬之後人爭賢功甫  
愛日精廬藏書志書上人集有木記云百計尋書志亦  
迂愛護不異隨侯珠有假不返遭神誅子孫不寶真其愚  
錢叔寶藏書印記也昌熾案所見懸罄藏書尚有十友齋



一印及中吳錢氏收藏印

鄭虔善書既名家張旭能書亦稱聖湖上垂綸二十年視官

如贅書爲命

陸師道子傳

陳道復復甫

無聲詩史陸師道字子傳長洲人進士工部都水司主事  
改禮部儀制司請急歸益肆力於學手鈔典籍後先積數  
千百卷丹鉛儼然小楷精絕林下踰二十年起補南儀部  
召爲繕部郎中擢尚寶少卿告歸卒年六十四先生初號  
元洲尋更曰五湖女趙陸卿子適隱士趙宦光子士仁字  
文近號承湖昌熾案郡志子傳嘉靖戊戌進士 列朝詩  
傳子傳文待詔弟子善詩工小楷古隸劄及繪事人謂待  
詔四絕不減趙吳興子傳約略似待詔而風尚標置亦相

亞云 乾隆蘇州府志陳道復初名淳後以字行更字復  
甫別號白陽山人少從文徵明游所棲曰五湖田舍 又  
云陳都憲璠宅在大姚都憲孫道復亦居此有閱颿堂碧  
雲軒 士禮居藏書題跋記中吳紀聞六卷陳白陽山人  
手校 韶宋樓藏書志湖北茶鹽提舉司新刊漢書一百  
二十卷有陳道復印陳淳私印 式古堂書畫攷趙子固  
墨蘭圖陸師道跋有陸氏子傳五芝玄澗二印又陳道復  
梅雪帖有姚里圓印

笥經蠹書老牖下脩然塵外寄高蹤濠南若奉三賢祀合與

都楊配瞽宗

吳岫方山

列朝詩傳百年以來老生宿儒起於古學衰落之餘笥經

藏書三  
蠹書往往有之吳岫方山非通人也聚書逾萬卷 千頃  
堂書目簿錄類姑山吳氏書目一卷方山吳岫 士禮居  
題跋記抱朴子卷末有吳岫小方印及姑蘇吳岫塵外軒  
讀一過小長方印余藏李文饒集爲嘉靖時人沈與文所  
藏有云壬戌五月借方山吳上舍本校勘則吳亦嘉靖時  
人矣 天祿琳琅續編晞髮集有方山吳岫二印 鐵琴  
銅劍樓書目大慧普覺禪師普說一卷有蘇郡吳岫圖書  
朱記又純全集有方山濠南居士吳岫朱記 昌熾案明  
都少卿元敬楊主事君謙皆住南濠皆喜藏書余嘗欲於  
南濠建三賢祠以奉方山及都楊二公栗主鄉士大夫無  
可與言者附其說於此以俟後世留心文獻之君子

四萬卷書百籤畫清森閣似米家船陸沈金馬真無謂東海  
歸來誓墓田 何良俊元朗

松江府志何良俊字元朗華亭人居柘林少與弟良傳皆  
負俊才時人以二陸方之良俊由貢謁選授南京翰林院  
孔目子元之字又元亦以淹雅見稱良傳字叔皮嘉靖十  
九年登鄉薦明年登進士禮部郎中 列朝詩傳元朗少  
而篤學二十年不下樓以歲貢授翰林院孔目鬱鬱不得  
志每喟然嘆曰吾有清森閣在東海上藏書四萬卷名畫  
百籤古法帖鼎彝數十種棄此不居而僕僕牛馬走不亦  
愚而可笑乎有何氏語林四友齋叢說行于世 四友齋  
叢說序何子少好讀書遇有異書必厚資購之撤衣食爲

費雖饑凍不顧也所藏書四萬卷涉獵殆徧 四友齋叢  
 說余家舊藏書幾四萬卷後皆燬於倭夷近日西亭殿下  
 以為余家藏書尚存書來假錄恨無以應其求矣 鐵琴  
 銅劍樓書目句曲外史集何元朗鈔本有東海何元朗朱  
 記 式古堂書畫攷蘇子美南浦詩帖有何氏元朗紫谿  
 真逸兩印 又呂寶臣子安學問帖有何氏元朗柘湖居  
 士兩印 又孫之翰虞侯還帖有橋里清賞何氏元朗兩  
 印 又呂望之蒙恩進職帖有何良俊印陸沈金馬門兩  
 印 又吳雲壑急足帖有何元朗氏兩山二印

問訊橋邊野竹齋井闌遺刻正當街夜深恐有蛟龍攫地下  
 春濃古畫埋 沈與文辨之

四友齋叢說余家有漢人畫非練非楮畫於車螯殼上此  
 是姑蘇沈辨之至山東賣書買回者聞彼處盜墓人每發  
 一墓其中不下數十石其畫皆作人物如今春畫意用以  
 壓勝恐蛟龍侵犯之也 士禮居題跋梁公九諫首葉有  
 辨之印此姑餘山人沈與文也 又剡錄十一卷周丈香  
 巖藏本為姑餘山人沈與文所藏卷中有吳門世儒家堃  
 竹齋兩長方印 又跋邵氏聞見錄云吳中杉瀆橋嘉靖  
 時有沈與文頗蓄書刻詩外傳 昌熾案杉瀆橋在胥盤  
 二門之間橋側有宋咸淳井闌刻亨泉二大字 經籍訪  
 古志韓詩外傳十卷朝鮮國刊本錢惟善序序後有吳郡  
 沈辨之野竹齋校雕記在亞字形內昌熾案此高麗翻沈

本也 鐵琴銅劍樓書目純全集沈辨之鈔本每葉欄外  
右角有吳縣野竹家沈辨之製九字 愛日精廬藏書志  
山海經三卷文彭跋云己亥六月獲觀於沈辨之有竹居  
昌熾案有竹居沈啓南齋名也張氏其有誤乎

太素終當勝雪窗校文可補邵南江溪南亦有州來裔翠帶  
樓前繫客艘 吳元恭 吳惟明康虞

阮文達爾雅注疏校刊記明吳元恭仿宋刻爾雅經注三  
卷嘉靖十七年秋七月東海吳元恭校刊有後序每葉十  
六行每行十七字卷末總計經若干字注若干字間有一  
二小誤絕無私意竄改處為經注本之最善者必本宋刻  
無疑 又元槧三卷無年代可攷首署雪窗書院校正新

刊八字故稱雪窗本 愛日精廬藏書志汲冢周書有吳  
元恭及吳興沈淪兩印 碩宋樓藏書志賈誼新書有壬

申十一月吳元恭校于太素館題字 昌熾案天祿琳琅

韓昌黎集有元共印監本穀梁注疏有吳印惟明康虞父

羣雅齋三朱記余所見萬曆甲寅焦竑刊橫浦集吳康虞  
校見竑自序式古堂書畫攷孫虔禮千字文有樵李馮夢

楨題云吳睿叔所藏睿叔名士諤友人康虞之子萬曆乙  
巳夏四月寓溪南吳氏翠帶樓書又米元暉五洲圖有吳  
睿叔吳士諤印

丹甲霞宮秘道經虛康為皮戶持局紅蟬日飼神仙字待爾  
丹成降列星 劉鳳子威

明詩綜劉鳳字子威長洲人嘉靖甲辰進士官至河南按察僉事有澹思太霞二集 余寅劉子威先生文集序夫人世諸闕記不足屬先生目也使天上有錄若霞宮丹甲地下有藏若汲冢覆釜先生盡耿諸其胸矣 又魏學禮序劉子威先生超絕有奇質家多藏書學勤博記安世之篋不足稱焉 子威非載閣記匪者何辟也載者何載籍也載籍則何言乎辟束而載之乎辟也戶牖之闕爲展內謂之家大者謂之栱長者謂之閣閣謂有所置也何言乎置當余之世有所謂簡策者則未知其爲韋竹之絕歟科斗之目歟予何以嗜嗜者遂古之遺尙於是乎微則因以求之也 又云古所謂閣今所謂閣也栴稅以櫻櫛栴直

而遂交以受檐其楠也方鑿垣而周之植傳之突以爲戶持戶持謂之扃扃而加鐫虛康爲度則置典焉實之以四方之書其言乎閣不足乎載也曰可矣乎未乎則求之乎方來者之辭也 又清舉樓記予居循郭之西左控河渠諸川匯焉四方之所走集也右招西南山經帶絡繹有若園徧然閒葺餘緒爲樓北址名之清舉以藏古圖籍且以游目放志焉 又樅廡記余嗜書嘗游四方每所遇必錄散遺不可讀者亦補緝綴之故所載雖無復往古之盛其在於今庶幾哉爲贍完已乎 玉劔尊聞酉陽雜俎蠹魚三食神仙字則化爲脈望狀如髮卷規四寸許得此者夜持向天從規中望星星便立降可乞丹度世劉子威聚仙

經令童於他書中取蠹魚置其上每日檢視冀有仙名被  
食者皇甫子循謂之曰我當刻一印記贈子曰蠹魚弟子  
夜霜如月月如雪玉楮銀鉤助我吟是虎是龍空一歎已隨  
賓客入秋琳

朱大韶象玄 孫克弘允執

松江府志朱大韶字象玄華亭人由莘莊遷郡城嘉靖二  
十六年進士選庶常授檢討以親老改南雍司業未幾解  
任歸築精舍構文園以友朋文酒爲事晨起登閣手丹黃  
點勘異書數葉始就櫛盥應賓客騷人墨卿履次於戶  
又禮部尙書孫文簡子克弘字允執以父蔭爲應天府治  
中擢漢陽知府忤高拱罷歸築室北俞塘以老 天祿琳  
琅宋刻六臣注文選趙文敏跋云霜月如雪夜讀阮嗣宗

詠懷詩九咽皆作清冷氣而是書玉楮銀鉤若與鐙月相  
映助我清吟之興不淺至正二年仲冬三日夜子昂識又  
王穉登跋瑯琊長公所藏漢書有趙魏公小象此書有公  
手書皆公鄴架中本也流傳三百年旣免蠹魚之腹又不  
落雌黃之手豈靈籤祕笈神物呵護之耶今歸朱司成象  
玄出示諦賞視漢書亦猶蜀得其龍吳得其虎矣 又六  
經圖孫克弘收藏有漢陽太守印 遜志堂雜鈔嘉靖中  
朱吉士大韶性好藏書尤愛宋時鏤版訪得吳門故家有  
宋槧袁宏後漢記係陸放翁劉須溪謝疊山三先生手評  
飾以古錦玉籤遂以一美婢易之蓋非此不能得也婢臨  
行題詩於壁曰無端割愛出深閨猶勝前人換馬時它日

相逢莫惆悵春風吹盡道旁枝吉士見詩惋惜未幾捐館  
偃曝餘談吾郡陸祭酒儼山最稱博雅徐長谷何栢湖  
張王屋朱察卿董紫岡繼之朱太史文石廣蓄宋版而鈔  
本書亦不下諸君捐館之後散落人間孫漢陽收得之至  
今借讀皆朱氏收藏印記昌熾案長谷徐獻臣伯忠也栢  
湖何元朗良俊也紫岡董宜陽子元也張王屋名之象朱  
察卿名邦憲竝松江人千頃堂書目有華亭徐氏書目一  
卷疑出自伯忠家 明畫錄雪居工詩居東郭草堂列名  
蹟於秋琳閣槃礴觴咏客至如歸 何義門跋王半軒文  
集王止仲雜文一冊本孫雪居舊書蔣生子遵得之吳興  
書賈乃倦圃散出殘帙也 鐵琴銅劍樓書目通鑑外紀

詳節有橫經閣收藏圖籍印未有朱文石氏朱記 又通  
鑑殘宋本有朱象玄氏朱記 而宋樓藏書志雞峯普濟  
方二十四卷有文石朱象玄氏白文長印 又陸宣公集  
有朱文石氏華亭朱氏印

鳧鼎云回古篆凝茗甌香沸玉河冰至今石室蘭臺裏黍軸  
牙籤半武陵 顧從禮汝由 從德汝修 從義汝和

松江府志顧定芳字世安上海人明世宗時召拜御醫子  
從禮字汝由工書夏言入閣值世宗狩承天以從禮薦厯  
官光祿寺少卿弟從義字汝和善書能詩嘉靖庚戌詔選  
端行善書從義名第五授中書舍人隆慶初擢大理評事  
家居構玉泓館手摹宋本淳化帖有研山山人詩彙行世

眉公筆記文壽承云在長安時過顧舍人汝由研山齋見其窗明几淨折松枝梅花作供鑿玉河冰烹茗啜之又新得鳧鼎奇古目所未見炙內府龍涎香恍然如在世外不復知有京華塵土天祿琳琅漢書宋刻本有趙孟頫象右方上書趙文敏公小像下書長洲陸師道題於顧汝修芸閣按秦漢印統黃姬水序稱爲東川御醫顧公所摹厥嗣汝由光祿汝修鴻臚汝和廷評共成之考松江府志從禮字汝由從義字汝和而不及汝修今卷中有顧從德印當卽汝修之名也又新唐書糾繆宋刻本明鴻臚顧汝修藏有武陵世家顧汝修印顧蒙三朱記唐書直筆新例同又資治通鑑興文署板顧從德藏有武陵聯珠印

又新刊唐柳先生文集顧從禮藏有武陵郡圖書記長印又有子先之印疑爲從禮之別字嚴元照書春秋張氏集傳後每冊有顧汝修印鐵琴銅劍樓書目春秋胡傳有顧從德印顧從義氏二朱印記

湘靈雪屋共追攀何氏三高大小山爽氣西樓超物表慈封

東郭近璠閒孫七政齊之孫朝肅功父朝讓光父曾

蘇州府志人物傳孫艾字世節父紀官刑部員外郎艾任

俠鑿山得美泉剝崖石緣高下結廬以待游者自號西川

翁子舟耒舟進士官工部主事耒子七政字齊之七歲能

詩才名藉甚所居西爽樓清暉館蓄古彝鼎書畫客至觴

詠其中著松韻堂集行世二子林森皆能詩森舉萬曆丙



午鄉試官至高州同知 又孫朝肅字恭甫更字功父七  
政孫萬曆丙辰進士廣東布政使弟朝讓字光甫崇禎辛  
未進士江西布政使未赴而明亡時年未五十優游林泉  
年九十而終 士禮居藏書題跋記李義山集三卷護淨  
居士跋曰先用錢副憲春池本寫有篇次無卷目乙亥六  
月孫方伯功父以一本見示煥然若披雲霧凡錢本之可  
疑一朝冰釋孫本爲無錫華氏物北宋本也 鐵琴銅劍  
樓書目陸士衡集舊藏大石山房孫氏有朝讓孫光父朱  
記 愛日精廬藏書志李商隱集三卷陳鴻跋曰丙戌正  
月借孫孝若家北宋版校昌熾案孝若爲錢履之之壻懷  
舊集有履之九月七日孝若壻移酌令叔光甫新閣承光

甫訂九日登高至期邀同已蒼夕公輩山行紀事詩詩云  
歲惟甲申月在九孫甥湯餅酌喜酒旣稱光甫爲孝若之  
叔則孝若爲朝肅子可知其所藏北宋本李集卽功父所  
得華氏之本蓋其家楹書也夕公卽錢龍惕之字龍惕有  
孝若所藏禪月大師十六羅漢一首又有同孝若送士龍  
歸吳門詩馮仲舒有孫孝若方廣居招看八面重臺牡丹  
詩又按天祿琳琅續編纂圖互注尙書宋光宗時刻本有  
虞山孫藩夔王氏之印卽宋樓藏書志國語二十一卷有  
虞山孫藩仲孝維考藏圖書朱文方印主司巷人家朱文  
長印儀顧堂題跋宋槧國語有孝維印及虞山孫氏慈封  
堂丙舍圖書朱文長印瞿氏書目鄒季友書傳音釋亦有

孫仲孝維收藏印攷孫藩字孝維爲孝若之異母弟見梅村所撰金孺人墓志銘及郭孺人壽序梅村集中有高涼司馬行贈孫孝若注云孝若初授衢州推官升高州同知又有孫孝維三十贈言海虞詩苑有孫永祚雪屋偕湘靈孝維飯破山寺詩又有春日過孝維南園詩一門羣從風雅相尙梅村詩云何氏三高推小隱一門羣從重中郎殆不評也

一枝一梧狀若丁以薦長物平不欹吾樓高廣義取是衡廿九尺縱半之

孫樓子虛

蘇州府志人物傳孫樓字子虛舟之孫嘉靖丙午舉人選湖州府推官改漢中致仕歸性好書杜門校讎晝夜不輟

所藏踰萬卷略無脫誤 又藝文類孫樓麗詞百韻百川集十卷詩集四卷 百川集有丁厠皮記云皮物者負壁爲依一枝一梧於兩端以承片木狀若丁者則謂之皮蓋隘於居而多長物者之爲也余嗜書插架幾萬卷家所稱長物亦惟書最多貫中以韋護表以繭類疊於櫝藏亦珍矣思夫鼠蠹莫之能齧溼暑莫之能泄曷若爽而塏之登之重屋之上陳諸疏櫺之中樓之其庶乎而居無隙地簾無羨金未之能樓也嘉靖乙丑積賣文金若干緡以易東鄰隙地數武噫茲可樓矣於是南向爲樓者三楹高二十尺衡二十有九尺縱半之右之偏復爲一楹以階下上於是移所藏而藏焉周遭高下通戶竇外罔非書者而予曰

讀於其中不知寥廓之爲廣吾樓之爲隘也樓以書建舍  
書罔以名遂顏其額曰丁冊庋客時有叩命名之義者予  
不勝荅也故爲之記云 又博雅堂藏書目錄序余家自  
先考功高曾而下故多藏書會中落靡有子遺而厥嗜彌  
堅米家船來余先眾以往推蓬恣揆賈亦苦之或赴試薄  
游兩都日遨列肆間一覩所未覩輒大叫喜不自禁若一  
旦獲拱璧恨相遇晚與之直或倍其索弗恡旣獲雖劇寒  
暑必諷之卒業家人日日下春矣可食矣夜向闌矣可眠  
矣卽附耳大呼若弗聞也者嘉靖庚戌命梓人作鉅廚六  
類而疊之殆逾萬卷咸躬自雘校手爲裝池錯簡脫幅百  
鮮一二越明年辛亥孟夏朔樂安文樓木天父書於拱宸

堂中其分類一經二史三諸子四文集五詩集六類書七  
理學書八國朝雜紀九小說家十志書十一字學書十二  
醫書十三刑家十四兵家十五方技十六禪學而道書附  
之十七詞林書又特錄制書類而附以試錄墨卷

吁嗟彈鋏食無魚春雪奚囊衍子虛不至東方飢欲死且同  
司馬慕相如 孫允伽伏生

懷舊集小傳孫膺伽字唐卿一字伏生子虛之孫秦季公  
之壻也子虛名樓季公名四麟皆讀書嫺古君亦衍其遺  
風與先府君游來必治具君不飲酒爲設鎚子性迂緩而  
短於視同伴者侮之每急食其精好者比君舉筋無所得  
予少侍食輒左右君君曰非小主人我終日作東方生飢

欲死耳所藏書多異本今尚存於家 讀書敏求記葛洪  
神仙傳十卷袁陶齋藏書後歸秦四麟流傳至允伽居士  
春雪樓三君皆好古碩儒所藏率多舊鈔本故其書正定  
可傳 東湖叢記酉陽雜俎續集鈔本萬曆戊戌七月既  
望生洲居士孫允伽跋 士禮居藏書題跋記文房四譜  
有趙清常跋云戊申八月友人孫唐卿自家山來奚囊中  
持此書因借錄并校其謬 前宋樓藏書志廣川畫跋六  
卷某氏跋曰萬曆甲寅假得瞿氏惜庵本校肩枷謹識昌  
熾案此卽孫唐卿也唐卿名字皆本唐孫伏伽陸氏不攷  
誤伽作枷枷者連枷說文所謂拂也又案唐卿著有玉臺  
外史談觚豔雪齋集見郡志藝文類

烏有子虛亡是公姓名本屬寓言同孫江何必非真我難燭

傳書課學童

孫江岷自

海虞詩苑孫江字岷自百川先生之元孫也嘗做徐孝穆  
玉臺例錄唐詩豔麗者爲緣情集所著有牢山花源問庚  
諸集 讀書敏求記唐僧宏秀集十六卷元人鈔本予獲  
之於孫岷自岷自購一古圖記刻鏤孫江字絕佳苦愛之  
卽改名江亦吾鄉俊民也昌熾案據此則江非原名也瞿  
氏書目有沈下賢集馮氏藏本葉奕傳錄孫明志再錄之  
又古文苑有岷自跋云趙凡夫藏宋刻紙墨鮮明字畫端  
楷靈均鈎摹一本友人葉林宗見而異之亦錄一冊辛巳  
夏假歸分諸童子三日夜鈔畢江與林宗爲友沈集亦錄

自林宗頗疑明志卽其原名但無可攷耳 愛日精廬藏書志武林舊事陸敕先跋曰此本余姻友孫岷自舊藏岷自不祿屈指已十有三年矣不勝人琴之痛康熙丁巳識稽瑞樓書目孫岷自詩選一卷

仰屋微聞嘆喑聲千金享帚太癡生銘心絕品原無價出納何妨讓阿兄 項篤壽子長

嘉興府志循吏傳項篤壽字子長嘉靖壬戌進士廣東參議 朱彝尊書萬歲通天帖舊事子長性好藏書見祕冊輒令小胥傳鈔儲之舍北萬卷樓其季弟子京以善治生產富能鑒別古人書畫所居天籟閣坐質庫估價海內珍異十九多歸之顧啻於財交易既退予價或浮輒悔至憂

形于色罷飯不噉子長偵諸小童小童告以實子長過而問曰弟近收書畫有銘心絕品可以齷心悅目者乎子京出其價浮者子長賞擊不已如子京所與值償焉取以歸其友愛若是子京子六人無一達者子長子德楨萬曆丙戌進士夢原萬曆己未進士德楨子鼎鉉萬曆辛丑進士聲國崇禎甲戌進士鄉人以爲厚德之報也 昌熾案項希憲爲子長仲子見太平清話師憲當是夢原之字聲國字敕公見嘉興府志其藏印曰聖師曰師孔謂項橐也曰馬生角篤字離合體也曰浙西世家曰少溪主人曰蘭石主人曰萬卷堂藏書記又有桃花邨裏人家杏花春兩江南兩印

十斛明珠聘麗人爲防奔月替文身紫茄白菟秋風裏一度  
題詩一愴神 頃元沐子京

明詩綜小傳項元沐字子京號墨林子又號香巖居士退  
密齋主人 劉體仁韻石齋筆談墨林生嘉隆承平之世  
資力雄贍出其緒餘購求法書名畫三吳珍祕歸之如流  
每得名蹟以印鈐之纍纍滿幅譬如石衛尉以明珠精鏤  
聘得麗人而虞其他適則黥面記之抑且徧黥其體無完  
膚較蒙不潔之西子更爲酷烈矣復載其價于楮尾以示  
後人此與西人監甲乙帳簿何異不過欲子孫長守縱或  
求售亦照原值而請益焉貽謀亦既周矣乙酉歲大兵至  
嘉禾項氏累世之藏盡爲千夫長汪六水所掠蕩然無遺

詎非枉作千年計乎物之尤者應如煙雲過眼觀可也  
朱彝尊還鄉口號詩墨林遺宅道南存詞客留題尙在門  
天籟圖書今已盡紫茄白菟種諸孫自注云天籟閣下有  
皇甫子循屠緯真題詩尙存 昌熾案竹垞稱子京有子  
六人嘉興府志項穆字德純元沐子國學生以子皋謨贈  
中書舍人箸貞元子集季弟德明字鑑臺諸生無聲詩史  
穆字玄貞一號蘭臺明詩綜小傳元沐子德新字又新一  
字復初又竹垞跋蘭亭神龍本云子京分授其子德弘式  
古堂書畫考陸柬之蘭亭詩有李日華跋云項子京物以  
遺長公玄貞則諸子中德純最長德新第三玄度爲墨林  
第五子皆見陳眉公筆記以字義求之玄度當卽德弘之

字眉公又屢稱項德棻項德達是否墨林子未詳元汴諸  
孫最有名者曰聖謨嘉謨昭代名人尺牘小傳聖謨字孔  
彰號易庵又號胥山樵元汴之孫有朗山堂集眉公筆記  
稱項西山下令之載孔彰蘭竹圖有大西山人印是西山  
卽其號也明詩綜小傳嘉謨字向彤一字君禹有讀選堂  
集靜志居詩話向彤墨林之孫乙酉城破投天星湖死又  
案子京昆弟三人仲卽子長長名元淇字子瞻著少岳山  
人集子道民字民逸能詩逃於禪皆見嘉興府志式古堂  
書畫攷子京荆筠圖後有跋云季父此卷入元鎮孟端堂  
與萬曆癸巳項德裕識稱子京季父疑亦元淇子又有項  
禹揆字子毗秀水學生不知其輩行士禮居藏宋刻陶集

卽其家本也子瞻印曰眾山響齋子京題跋皆署櫻窗庵  
其藏印曰寄敖曰墨林山人曰世濟美堂曰傳家永寶曰  
神游心賞曰古樵李狂儒墨林山房史籍印天祿琳琅明  
刻春秋經傳集解六臣文選皆有世美堂古狂一印疑亦  
項氏物也德棻藏書處曰宛委堂葉廷珪所得避暑錄話  
陳仲醇手鈔者其舊藏也

稿項黃誠山澤癯閉門造車出可驅邑居一一署紙尾橋西  
涇北河南隅

邱集子成

嘉定縣志邱集字子成精三禮家貧或日不重炊而讀書  
不輟晚依妻族周氏居太倉雙鳳里萬曆癸卯卒年八十  
學者稱寒谷先生 又藝文別集類陽春草堂集六卷西

行小橐二卷橫架小橐二卷皆邱集著注引馬舒曰子成  
沒後其子攜父書求售予典錢付之得書數種 天祿琳  
琅後編宋刻唐六典書未有墨迹云蘇州嘉定服禮鄉沙  
岡里泰定永福橋西茭門涇北河南邱氏藏書押有一印  
破脫又有芟川文房之印嘉定邱家頤桂堂邱集依叔譜  
朱記 愛日精廬藏書志書蔡傳劬通邱氏跋曰予得之  
昌門市中考其印記乃廬嘉威藏書也予性嗜書如藥與  
餌辛卯伏日袒裼裝葺識而藏之年六十八萬曆十有九  
年嘉定寒谷邱集子成 又跋題黃泥田父手記 又跋  
壬寅仲夏再閱一過在邑居敦義堂三完老人時年七十  
九

得一奇書失一莊團焦猶戀舊青箱眼前束筍呼奴子身後

駢枝問貨郎

王世貞元美 世懋敬美

列朝詩傳王世貞字元美太倉人嘉靖進士除刑部主事  
出爲青州兵備副使父忤總督薊遼下獄論死元美解官  
奔赴與弟世懋叩闕請救卒不免穆廟初起家補大名兵  
備遷應天府尹以人言乞歸後起拜刑部尙書乞歸卒年  
六十五又世懋字敬美嘉靖進士太常寺少卿 少室山  
房筆叢王長公小酉館在弇州園涼風堂後凡三萬卷二  
典不與構藏經閣貯焉爾雅樓度宋刻書次公亦多宋梓  
天祿琳琅漢書宋刻本王世貞跋余平生所購周易禮  
經毛詩左傳史記三國志唐書之類過三千卷皆宋本精



絕最後班范二書尤諸本冠前有趙吳興像余失一莊得  
之次頁繪像旁小楷書王弇州先生像六字又王士騏跋  
此先尚書九友齋中第一寶也近爲國稅歸之質庫書此  
誌愧明史載士騏世貞子字罔伯萬曆十七年進士終吏  
部員外郎能文又六臣注文選世貞跋此本繕刻極精紙  
用澄心堂墨用奚氏舊爲趙承旨藏往見於同年朱太史  
家太史物故有客持售余束身團焦五體外無長物前得  
漢書不復置几頭甯更購此題而歸之壬午春日書於曇  
陽觀大參同齋中又曹子念跋予於萬卷樓見弇州公所  
得兩漢書爲宋版第一後有持文選至者從臾公得之爲  
合璧公以奉道屏去一切玩好猶爲題數語令客持去念

之常以爲恨 湧幢小品王弇州書室中一老僕能解公  
意欲取某書某卷某葉某字一脫聲卽檢出若有夙因余  
官南雍常熟陳抱冲禹謨爲助教其書滿家亦有一僕如  
弇州 人海記王元美所著讀書後四本捐館後公子士  
騏于貨郎擔中重得刻以行世 東湖叢記毛子晉云王  
弇州藏書每以貞元二字印鈐之又別以伯雅仲雅季雅  
三印 莫子偲經眼錄晉書宋本有鼎元仲雅印毛晉跋  
云此書爲王弇州先生所藏貞元本唐德宗年號印恰符  
先生名字故其祕冊往往摹而用之下必繼以三雅印昌  
熾案貞从籀文作鼎故天祿琳琅凡遇鼎元印皆誤作鼎  
又案式古堂書畫攷弇州藏法書處曰爾雅樓范文正與

師魯二帖王世貞跋後有貞元五湖長乾坤清賞三印又  
弇州雜詩帖有默然守吾口一印又王晉卿煙江疊嶂圖  
元美跋有天弼居士太僕寺印撫治鄖陽等處關防三印  
王世懋跋有牆東居士印又前有有明王氏圖書之印  
七十老生周九松真書上重篆下重炳燭餘明還矍鑠不教  
倒用等司農 周良金

楹書隅錄宋本後漢書有毘陵周氏九松迂安藏書記周  
良金印周氏藏書之印周詰之印口雅私印又卷中每於  
字旁識以朱點眉閒鈐一印印作兩重上重真書曰古義  
下重篆書曰七十三老生記朱文 又元本四書輯釋有  
毘陵周廷口氏裝潢印識周氏藏書之印 鐵琴銅劍樓

書目四書宋刊本有毘陵周氏九松迂安藏書記周良金  
印周笈私印 昌熾案九松藏印見於各家書目者甚多  
天祿琳琅前編元刊柳州集歐陽文忠集新編古賦題皆  
有其印續編四書辨疑有周笈私印諸周惟良金爲明嘉  
靖三十年歲貢光祿寺署丞見武陽合志選舉類餘不可  
攷

沙隨先生書滿家自言黎味不如檀禮堂翻定童烏本痛極  
優曇頃刻花 晁璩君石 子東吳叔權

千頃堂書目簿錄類寶文堂書目三卷晁璩 四庫提要  
璩字君石號春陵開州人宋太子太傅迥之後嘉靖辛丑  
進士官至國子監司業其子東吳字叔權嘉靖癸丑進士

選翰林院庶吉士父子皆喜儲藏此本以御製爲首上卷分總經五經四書性理史子文集詩詞等十二目中卷分類書子雜樂府四六經濟舉業等六目下卷分韻書政書兵書刑書陰陽醫書農譜藝圃算法圖誌年譜姓氏佛藏道藏法帖等十五目其著錄極富雖不能盡屬古本而每書下闕爲注明某刻亦足以收見明人版本源流 畿輔通志誠痛錄明晁東吳撰東吳琛次子弱冠第進士年二十三卒其父琛手錄其遺文總四卷墨蹟一卷名曰誠痛錄 亡兒恭彝生於同治甲戌歲體羸而嗜學余每得古碑精槩助余著錄喜形於色尤留心鄉邦文字某人著某書或存或佚隨問隨答瞭如指掌蓋其沈默疆識天性然

也去歲春忽得氣虛腫證百治不瘳至十月朔竟不起年適二十三歲此章不幸遂成詩識悠悠蒼天尙何言哉亡兒在里嘗奉教於曹叔彥內翰內翰嘗詔以輯高密諸經故訓爲鄭氏雅許君諸書涉禮學者爲許氏禮屬橐粗具未有定本他日擬爲理董稍抒童烏之痛崦崦暮景精力幾何未知能償此願否耳光緒丁酉上元日緣齋記

競讀尊生第七箋講求雙綫與單邊豈知五岳真形印更有遺聞出稚川 高濂深父

高深甫燕閒清賞箋論藏書云藏書以資博洽爲丈夫子生平第一要事宋元刻書雕鏤不苟校閱不訛書寫肥細有則印刷清脹况多奇書未經後人重刻惜不多見佛氏

醫家二類更富然醫方一字差誤其害匪輕故以宋刻爲善宋人之書紙堅刻軟字畫如寫格用單邊閒多諱字用墨稀薄雖箸水經燥無涇跡開卷一種書香自生異味元刻仿宋單邊字畫不分粗細較宋邊條闊多一線紙鬆刻硬用墨穢濁中無諱字開卷了無臭味有種官券殘紙背印更惡宋版書以活襯紙爲佳而蠶繭紙鵠白紙藤紙固美而存遺不廣若糊稍宋書則不佳矣余見宋刻大版漢書不惟內紙堅白每本用澄心堂紙數幅爲副今歸吳中真不可得又若宋版遺在元印或元補欠缺時人執爲宋刻元版遺至國初補欠人亦執爲元刻然而以元補宋其去猶未易辨以國初補元內有單邊雙邊之異且字刻迴

然別矣若國初慎獨齋刻書似亦精美近日作假宋版書者神妙莫測將新刻模宋版書特鈔微黃厚實竹紙或用川中繭紙或用糊扇方簾棉紙或用孩兒白鹿紙筒捲用槌細細敲過名之曰刮以墨浸去臭味印成或將新刻版中殘缺一二要處或涇徽三五張破碎重補或改刻開卷一二序文年號或貼過今人注刻名氏留空另刻小印將宋人姓氏扣填兩頭角處或用砂石磨去一角或作一二缺痕以燈火燎去紙毛仍用艸煙熏黃儼狀古人傷殘舊迹或置蛀米櫃中令蟲蝕作透漏蛀孔或以鐵線燒紅鎚書本子委曲成眼一二轉折種種與新不同用紙裝襯綾錦套殼入手重實光膩可觀初非今書彷彿以惑售者或

札夥囿令人先聲指爲故家某姓所遺百計瞽人莫可窺  
測多混名家收藏者當具真眼辨證昌熾案屠赤水考槃  
遺事論宋版一則與此大略相同不知誰爲郭象誰爲向  
子期也余所見高氏藏書甚多其印記曰鈔賞樓藏書曰  
高氏鑑定宋刻版書曰武林高深父鈔賞樓藏書又有五  
岳真形印每冊首皆用之其事出抱樸子外篇謂可御不  
祥又攷天祿琳琅明刻漢書有武林高瑞南家藏書畫印  
瑞南二字印楹書隅錄宋本周易本義有高丙家藏武林  
高瑞南家藏書畫印二朱記又蕘圃玄珠密語跋中有古  
杭高氏藏書印高瑞南明中葉藏書家何夢華有宋刊朱  
氏集驗方余舊藏宋本外臺祕要亦有其圖記又跋云外

科祕方明高瑞南刻也序云余少志博習得古今書最多  
更喜集醫家書

千羊不如一貉多墨光紙質細摩挲淮南舊出清河舫三百

年來一剝那

張應文茂實

子丑青父

張秋塘

乾隆蘇州府志張情字約之嘉靖戊戌進士福建兵備副  
使張應武字茂仁情子 青瓊雜志張丑字青父情之孫  
父應文字茂實博綜古今與王世貞相善自嘉定徙居長  
洲丑好法書名畫接討古今上自秦漢下及當代爲清河  
書畫舫十二卷 張茂實清祕藏藏書貴宋刻大都書寫  
肥瘦有則佳者有歐柳筆法紙質勻潔墨色清純爲可愛  
耳若夫格用單邊閒多諱字雖辨證之一端然非攷據要

訣余向見元美家班范二書乃真宋朝刻之祕閣特賜兩  
府者無論墨光煥發紙色堅潤每本用澄心堂紙爲副尤  
爲精絕前後所見左傳國語老莊楚詞史記文選諸子諸  
名家詩文集約千百册一一皆精好較之元美所藏不及  
多矣 何焯李賀歌詩編跋方文軒從常州一士人借得  
北宋本歌詩編有文柁端文補寫之葉且記目錄後云此  
書半偈翁舊藏今歸青甫舅氏半偈菴王百穀所築精舍  
青甫則張丑也 昌熾案廣一號彝齋青甫原名謙德  
清河書畫舫云謙德丑舊名也故字叔益萬曆丙戌先子  
獲秦人張丑古印而不腆實以丁丑生遂易今名云又式  
古堂書畫攷張情奧曠巢記青父跋題孫男牛郎丑牛郎

當是其小字豔豔春山圖跋題亭亭山人其別號也又案  
士禮居題跋記屢言得自張秋塘其跋淮南子云余得諸  
顏家巷張秋塘處云是其先世青父公所藏然則清河世  
澤遠矣惜秋塘名不可攷

吾服南禺箸錄才按圖一一索龍媒冰生於水寒於水百宋

遺文此脫胎

華夏中父

豐道生真賞齋賦暨乎劉氏史通玉臺新詠

上有建業則文房之印

南唐之初梓也聶崇義三禮圖俞言等五經圖說乃北宋

之精帙也荀悅前漢紀袁宏後漢紀

紹興間刻本嘉史久汝陰王鍾序

遺許嵩建康錄陸游南唐書載紀攸罕宋批五禮五采如

新古注九經南籬多闕蘇子容儀象法要亟稱於諸子張

彥遠名畫記鑒收於子昂相臺岳氏左傳建安黃善夫史

記六臣注文選郭知達集注杜工部詩共九家曾暹校曾南豐序

次李翰林集三十卷五百家注韓柳文在朱子前劉賓客集共四卷

內外集白氏長慶集七十卷歐陽家藏集刪繁補缺入十三卷

蘇全集王臨川集世所傳止一百卷唯此本一百六十卷管子韓非三國志

大字本淳熙乙巳刊鮑參軍集十卷花間集紙墨精好雲溪友議

于潼州轉運使公帑十二卷經鉏堂雜志入卷靈川倪思金石略鄭樵

藏寶晉山林拾遺八卷孫米憲刻東觀餘論宋刻初印卷帙甚備世所罕見唐名

畫錄朱景玄五代名畫補劉道醇纂宋名畫評蘭亭攷十二卷皆

傳自宋元遠有端緒又云齋中有白玉螭鈕三印改刻

瓢印曰真賞方印曰華夏一曰真賞齋印扁則李西涯八

分書以來元章有平生真賞印也嘉靖二十八年南禺外

史豐人叔為敘賦昌熾案顧淵蘋百宋一塵賦即自人翁

賦脫胎但後來居上耳何義門跋茅鹿門評王荆公文

鈔內閣宋刻臨川集其行字卷帙與此皆同唯華中父真

賞齋所藏獨為一百六十卷不知向在人閒否以中甫之

力能重刻以傳而獨私之為齋中珍玩吁可慨已天祿

琳琅明袁刻文選有真賞齋圖記迨朗三萬六千頃湖

中畫船錄仇十洲鍾馗圖尾有華夔私印白文引首印二

曰真賞齋印曰東沙居士昌熾案夔當為夏字之誤

小兒逃塾含飴樂巧婦深閨得寶歌去恐不來來欲色愛書

結癖比如何沈節甫以安沈啓原

湖錄沈節甫字以安號錦宇烏程人嘉靖己未聯捷進士  
工部侍郎子淙蘇州同知次淮大學士次演南刑部尙書  
吳興藏書錄沈節甫玩易樓藏書目錄自序云余性迂  
拙無他嗜好獨甚愛書每遇貨書者惟恐不余售既售且  
去惟恐其不復來也顧力不足不能多致又不能得善本  
往往取其直之廉者而已卽有殘闕必手自訂補以成完  
帙丙寅在告偶閱陸文裕公藏書序訝其言有類予者噫  
薄富貴而厚於書蘇長公所以自笑也寓意則樂留意則  
病今予得無病乎雖然予癖已成未之能革也養厥靈根  
脫去華葉請埃他日因彷彿文裕公之意更爲編次如左  
千頃堂書目簿錄類湖州沈氏玩易樓藏書目二卷又

沈啓原存石州堂書目十卷注云秀水人嘉靖己未進士

昌熾案啓原嘉興府志無傳據選舉表官至副使

老子韓非竟同傳孫公樂令每清談藏書倘補吳興錄海屋

流風晉石姚翼翔卿 國朝姚觀元彥侍 子慰祖公蓼

湖錄姚翼字翔卿號孺參歸安人爲廣濟知縣告歸傍南

城構屋數楹貯圖書萬卷晚年自號海屋子 吳興藏書

錄姚翼玩書齋藏書目錄自序略云金玉珠璣之好舉世

所同也同則聚於吾也垂涎者必眾而况其所好既終

身於此則其子若孫率皆溺於紈綺膏粱作業竭而財日

匱其末必不能自給又無義禮以養其心而孝敬之念既

衰則其於祖父精神手澤渺然不爲介慮舉而棄之如視



做屣以子孫如視做屣之心而乘之以舉世垂涎之欲吾見聚之以數十年之力者不終朝而澌滅無遺矣乃若書之好千萬人而無二三焉方吾之好而聚之也人將嘆之不暇焉有同好者睥睨其旁哉而況爲其子孫者縱非皆能讀父書而目染耳濡之餘或稍稍習儉素以自保且非甚狂病不肖當不忍死其親而捐其所甚好雖欲捐之又或苦於售之不易而中沮然則吾之好書雖限於力而不能多致使汗牛充棟竊獨喜其可久據以爲吾有也故特齋而藏之又籍而錄之 姚彥侍方伯名覲元歸安人文僖公之孫由農曹出爲川東道閻忠介公筦司農公與楊鵠山諸君同被劾罷官僑寓吾吳蕭家巷公子慰祖字公

蓼父子皆好藏書方伯所刻咫進齋叢書有功藝林甚鉅公蓼別刻晉石工叢書僅成吳興藏書錄經籍跋文鄭氏學錄古今僞書攷四種初鋟木時即以見貽今父子相繼宿草每檢遺編不勝山陽之感晉石工者方伯在蜀得晉楊宗石闕題字攜以東歸顏其藏書之室也

海上天然圖畫樓道人何處訪元郵黃門墳素堆場圃綠野衣冠歎壑舟 潘允端仲履

昌熾案天祿琳琅前編明刻文選有雲閒潘氏仲履父圖書印續編史記元祐時槧本有御史大夫章潘印允端天然圖畫樓收藏書籍印唐室分封肇姓皇明科甲世家四印六臣文選河東裴氏刻本同惟多潘印略如一印潘允

端字仲履上海人嘉靖進士官四川右布政使卽作豫園  
樂壽堂以奉其父者其父恩以南京工部尙書都御史致  
仕故有御史大夫章 持靜齋書目考古圖十卷續圖五  
卷有豫園主人印 紅豆樹館書畫記孫雪居畫冊有南  
箕老人元郵道人圖書雲間潘氏仲履父圖書三印

劔氣延津射斗牛朱薨高敞揭簾鉤莫疑金谷河陽宅兼兩  
瑤籤在上頭 孟守約

孫樓百川集守約孟君藏書於樓扁曰玉輝詩以贈之孔  
壁聖祕啓汲冢靈詮抽七略名已邈五厄爛不收君家富  
緗素度之重檐樓朱薨敞綺疏絳帷揭纖鉤不以貯歌舞  
爰迺工吟謳琅函耀璀璨瑤軸麗雕鏤兼兩擬茂先滿架

夸鄴侯文光貫奎壁虹氣干斗牛卻疑羣玉府忽在三江  
頭珠淵白光發劔津赤煙浮矧茲援神契具闡邃古幽君  
旣發其藏歸然聚如邱英華一以咀醜粕旋爲留書淫任  
時誚錢癖非吾流予亦劬書子玄覽思披按家藏篋易盡  
閱肆市無儔何當人帳中遺珍恣採俞寶光豈蜀賁徐邈

賚交游

得一古書益一友劉牢之乃似其舅餘事雲間作畫師清談  
霞外尋僊交 莫雲卿廷韓

陸文定中江莫公墓志銘公諱如忠字子良中江其號浙  
江右布政使子男九人是龍恩貢生有文名先公卒 上  
海縣志游寓傳莫是龍字雲卿以字行更字廷韓號秋水

華亭方伯如忠子工古文詞書畫亦凌轢古今一時名流  
無敢抗席 無聲詩史廷韓得米海嶽石下刻雲卿二字  
因以爲號 士禮居題跋記珩璜新論楊夢羽藏書後有  
墨筆題識出莫雲卿陳子準云五川身後因事被累舉所  
藏書歸諸莫氏蓋雲卿爲五川之甥也又詩云七檜山房  
萬卷樓楊家書籍莫家收自注雲卿與董文敏相傳是甥  
舅今又云爲五川之甥未知其的當詢子準昌熾案陳眉  
公偃曝餘談亦云廷韓得其外家常熟楊夢羽藏書眉公  
與董文敏爲石交雲卿若爲其甥不容不知也 雲卿筆  
塵蓄一古書須考校譌謬及耳目所不及見者真似益一  
良友 又與友人書古梅花放時以磐石置彝鼎器焚香

點茶開內典素書讀之正似共百歲老人捉麈談霞外事  
鴈鶉東城雜記明雲閒莫是龍有聞於時近吾杭莫雲  
卿如鯨亦以文雅好事爲名流所重毛稚黃贈詩所謂昔  
字雲卿者君其伯仲閒是也 天祿琳琅宋版南華真經  
有莫雲卿賞識印又唐柳先生文集雲閒莫氏城南精舍  
藏書有莫氏雲卿城南精舍莫生秋水朱記 紅豆樹館  
書畫記莫廷韓秋山無盡圖有清味少人知山有壽兮松  
有茂二印 式古堂書畫攷雲卿印有曰思玄亭曰碧山  
樵曰虛丹子曰玉關山人

爲慕玄亭揚子雲又玄亭亦寄斯文但觀玄覽中區字便識  
狸奴典守勤 秦四麟季公 秦景陽

懷舊集小傳孫胤伽秦季公之壻也季公名四麟讀書嫻古蘇州府志選舉類常熟萬曆八年貢秦三麟字仲祥宜興訓導昌熾案當爲季公之兄世無有知者矣海虞詩苑秦蘭徵字元芳世居邑西大河祖四譽善填詞曲嘗以省試至金陵行囊惟挾琵琶西廂兩記同伴訝之公笑曰吾患曲不工耳不患文中也其放誕多此類蘭徵與龔士達乞糶狸詩那有餘糧愁鼠耗只勞架上守殘書愛日精廬藏書志鈔本穆天子傳六卷版心有元覽中區四字秦西巖藏書也又吹劍錄版心有元覽中區四字孫岷自跋曰秦公手鈔甚富筆法流逸是蓋老年筆也寶之寶之鐵琴銅劍樓書目極玄集每葉版心有又玄

齋三字卷末題云此吾鄉秦西巖手錄庚寅上元日遵王見贈弗乘卷中有五嶺山人又玄齋校閱過二朱記又烏臺詩案邑秦氏藏卷首有石秦氏四譽之印二朱記天祿琳琅東觀餘論有秦季公四譽書隱雍門世家又玄亭收藏圖書印諸朱記錢謙益虞逸夏君墓誌銘君諱時中字夏父少從景陽秦君游而與少補蔣君爲童子師秦君家故饒於賞喜藏書朱黃丹白開卷爛然從人得祕書多用行書好寫篝燈讎勘老而不倦蔣君尤貧不能購書人間多有之書皆手自繕寫盈箱溢几尤爲專勤昌熾案景陽疑卽四麟並存之以俟攷

草索相從敢畏讒前惟郭亮後王咸自從不見何郎集中笥

還當密密緘

何錚子端

孫述稷公藝

述泉公邁

雲士

節宋樓藏書志何水部集有葉林宗跋曰何錚字子端秦  
 季公之友也好聚古書嘗擬元人書何遜集一卷筆精墨  
 妙字字有法在其季孫士龍處一旦為人竊去此本乃從  
 士龍鈔得者後人其寶之 錢謙益何仲容墓誌銘仲容  
 諱德口父錚通內典工小楷仲容沿襲素風食貧自守性  
 好潔焚香布席書帙井井娶秦氏生子五人述禹述稷述  
 契述皋雲雲吾徒也 海虞詩苑何雲字士龍祖錚好藏  
 書多善本君服習家教自少即能為古文錢宗伯愛其才  
 延致家塾宗伯被訐下獄君草索相從世以比郭亮王咸  
 焉又從瞿中丞至閩粵流離艱苦歷十五載乃歸 又何

文學述稷字公藝自號晴簑道人著有晴簑草堂集 懷

舊集何述皋字公邁娶於秦名淑季公之孫女也

爛然朱鉢縫中黏舊本相傳自建炎重到西州長慟日蠨蛸

絲滿鄴侯籤 何鈞子宜 子允泓 季穆

錢謙益故淮府左長史何公墓誌銘公諱鈞字子宜嘉靖

乙卯科舉人知溫州之平陽縣升南京錦衣衛經歷淮王

左長史子三人世滋允澄允泓 蘇州府志何允泓字季

穆淮府長史鈞季子 鐵琴銅劍樓書目三朝北盟會編

邵恩多跋曰季滄葦家鈔本每葉有何子宜騎縫圖記者

最古 秦蘭徵元芳經舅氏何季穆先生故居詩鄴侯架

在蟲生網內史池空雨結苔昌熾案元芳四磨之孫也

攘雞術幻甘爲賊營蜜心勤亦是癡風雪登高腰脚健袖中  
炊餅且充飢 何大成君立

蘇州府志選舉類進士明萬曆甲戌孫繼皋榜常熟有何  
鏞字子啓興化推官 懷舊集何大成字君立晚自稱慈  
公祖鏞萬曆甲戌進士君其孤孫也以孤故驕少習舉子  
業必設舉比南面據案坐夜黠兩巨燭若官府治事者所  
居去城七十里曰何家市君性伉急善罵人婦更奇妬當  
嗃嗃相構時旁人見其夫婦若疑疑額出角與余最善得  
一書必相通假約日還風雨不誤歲癸酉卒無子遺書散  
爲雲煙矣 慈公同馮已蒼昆季入寒山鈔玉臺新詠畢  
遂游天平詩吾儕真書淫餘事了游癖旣理支硎棹旋放

天平屐自惟老脚硬尚堪年少敵登登及山椒千步始一  
息憑高一以眺萬木靜如拭湖光浩渺平山容逶迤出憶  
昨小宛堂鈔書忘日昃手如蠶食桑心似蠶營蜜今朝始  
畢功探奇何孔棘蠅營滿天地此樂無人得游山擬爲樵  
蒐書甘作賊幸茲江南安二事乃吾職昌熾案黃琴六讀  
知不足齋賜書圖記云吾鄉馮已蒼昆仲聞寒山趙氏藏  
有宋槧本玉臺新詠未肯假人嘗於冬月挈其友艤舟支  
硎山下於朔風飛雪中挾紙筆袖炊餅數枝入山逕造其  
廬迺許出書傳錄墮指呵凍窮四晝夜之力鈔副本以歸  
今觀慈公此詩則與二馮同游者實慈公也又湧喜齋藏  
明刻文潞公集前有趙琦美印後有楷書鈐記云吳郡何

慈公娛野園珍藏書籍卷末有慈公手跋云崇禎壬午吳君平以是集求售故內兄玄度物也玄度即琦美之字然則慈公婦爲趙氏矣

死後精英尙不磨荒山靈鬼哭煙蘿但聞白首無書歎何有充箱塞屋多

趙文毅用賢 子琦美元度

明史趙用賢字汝師隆慶五年進士歷吏部左侍郎天啓初贈太子少保禮部尙書諡文毅 常熟縣志用賢子琦美字元度以蔭至刑部郎中隆美字文度由刑部郎中出知叙州府士春士錦皆其子也 錢謙益刑部郎中趙君墓表君天性穎發博聞彊記欲網羅古今載籍甲乙銓次以待後之學者損衣削食假借繕寫三館之祕本兔園之

殘冊刊編齧翰斷碑殘壁梯航訪求朱黃讎校移日分夜窮老盡氣好之之篤摯與讀之之專勤近古所未有也官南京都察院照磨修治公廨費減而工倍君曰吾取宋人將作營造式也丞太僕印烙之事人莫敢欺君曰吾自有相馬經也 香祖筆記常熟趙定宇少宰閱舊唐書每卷必有朱字數行或評史或閱之日所遇某人某事一一書之 秦四麟錄異記跋趙子元度爲今大司成定宇公冢器翩翩好古綽有父風 錢曾讀書敏求記洛陽伽藍記五卷清常道人跋云吳瑄刻齟齬不可句因購得陳錫元秦西巖顧甯宇孫蘭公四家鈔本改譌四百八十八字增脫三百廿字丙午又得舊刻本校于燕山龍驤邸中復改

正五十餘字凡歷八載始爲完書清常言讎勘之難如此  
子嘗論牧翁絳雲樓讀書者之藏書也趙清常脈望館藏  
書者之藏書也清常歿其書盡歸牧翁武康山中白晝鬼  
哭嗜書之精爽若是子腹笥單疏囊無任敬子之異本然  
絳雲一燼之後凡清常手校祕書都未爲六丁取去牧翁  
悉作蔡邕之贈豈非幸哉 又也是園書目後序趙元度  
初得李誠營造法式中缺十餘卷徧訪藏書家罕有蓄者  
後於留院得殘本三冊又借得閣本參攷而閣本亦缺六  
七數卷先後蒐訪竭二十餘年之力始爲完書圖樣界畫  
最爲難事用五十千命長安良工始能措手今人巧取豪  
奪溝澮易盈焉知一書之難得如此元度收藏二酉五車

斯架塞屋臨老乃發無書之歎非無書也挂一漏萬之意  
也 昌熾案琦美自號清常道人有脈望館書目

和龍之所弗能燔仲尼之所存弗論王京人烏須彌頂一切  
奇書皆寓言 胡應麟元瑞

明詩綜小傳胡應麟字元瑞更字明瑞蘭溪人萬曆丙子  
舉人有少室山房豪 澹生堂藏書訓婺州胡元瑞以一  
孝廉集書至四萬二千三百八十四卷 人海記義烏虞  
守愚侍郎藏書萬卷蘭溪胡孝廉應麟賤值得之隨亦散  
佚 王世貞二酉山房記余友人胡元瑞性嗜古書籍少  
從其父憲使君京師君故宦薄而元瑞以嗜書故有所購  
訪時時乞月俸不給則脫婦簪珥而酬之又不給則解衣



以繼之元瑞之橐無所不罄而獨其載書陸則惠子水則  
宋生蓋十餘歲而盡毀其家以爲書錄其餘貲以治屋而  
藏焉屋凡三楹上固而下隆其趾使避溼而四敞之可就  
日爲度二十又四高皆麗棟尺度若一所藏之書經史子  
集四萬二千三百八十四卷元瑞自言於他無所嗜所嗜  
獨書飢以當食渴以當飲誦之可以當韶護覽之可以當  
夷施憂藉以釋忿藉以平病藉以起性旣畏客客亦見畏  
門屏之閒剝啄都盡亭午夜坐榻隱几焚香展卷就筆  
於研取丹鉛而雛之倦則鼓琴以抒其思如是而已噫元  
瑞於書聚而讀之幾盡矣屠龍之技殫而世亦無所用子  
矣盍亦舍而從吾游乎玉京人鳥須彌之頂有祖龍之火

不能燔而仲尼之博姑存之弗論者吾將發其一二以窺  
子卽二酉之藏皆糟粕已 少室山房筆叢張文潛柯山  
集一百卷余於臨安僻巷見鈔本印記奇古裝飾都雅余  
驚喜時不持一錢顧奚囊有綠蘿二匹并解所衣烏絲直  
掇青蜀錦半臂罄歸之其人苦書不售得值慨然因約明  
旦余返寓通夕不寐黎明不巾櫛訪之則夜來鄰火延燒  
此書倏煨燼矣

玉笈珠囊製駝鬱儀遺燼亦無多晉江父子藏書處石戶  
分明有鬼詞 黃居中明立 子虞稷俞郃

明詩綜小傳黃居中字明立晉江人萬曆乙酉舉人自上  
海教諭遷南京國子監丞有千頃齋集 靜志居詩話監

丞銳意藏書手自鈔撮仲子虞稷繼之歲增月益太倉之  
米五升文館之燭一把曉夜孜孜不廢讎勘 鶴徵前錄  
虞稷字俞部一字楮園 周亮工黃母周宜人七表壽序  
海鶴先生厭世長公俞言有雋才已先先生朝露宜人撫  
俞部成立能守先世之藏書夏必暴蠹必簡猶時時借人  
藏本稽其同異昌熾案俞言名虞龍 錢謙益黃氏千頃  
齋藏書記戊子之秋余頌繫金陵方有采詩之役從人借  
書林古度曰晉江黃明立先生之仲子守其父書甚富賢  
而有文蓋假諸余於是從仲子借書得盡閱本朝詩文之  
未見者於是歎仲子之賢而幸明立之有後也仲子來告  
我曰虞稷之先人少好讀書老而彌篤自爲舉子以迄學

官修脯所入衣食所餘未嘗不以市書也藏書千頃齋中  
約六萬餘卷余小子哀聚而附益之又不下數千卷惟夫  
子之於書有同好也得一言以記之庶幾劫灰之後吾父  
子之名與此書猶在人間也 又云闖賊一炬內閣之書  
盡矣而內府祕殿之藏如故也煨燼之餘繼以狼籍舉凡  
珠囊玉笈丹書綠字綈几之橫陳乙夜之進御者用以汗  
牛馬製駱駝蹈泥沙藉糞土求其化爲飛塵蕩爲烈焰而  
不可得自有喪亂以來載籍之厄未之有也海內藏書之  
富莫先於諸藩今秦晉蜀趙燿矣周藩之竹居甯藩之鬱  
儀家藏與天府埒今皆無尺蹠片紙矣汶洛齊楚之閉士  
大夫之所藏又可知也黃氏之書儼然無恙則豈非居福

德之地有神物呵護而能若是歟 黃宗羲次族姪俞邵  
見贈詩秣陵焦氏外千頃聚書多石戶樓千祕宗人許再  
過從來耽怪牒豈以易鳴珂況說今加富應知有鬼訶

東湖叢記千頃堂藏書有晉江黃氏父子藏書印

海上樓船駕怒濤燔書劫共暴秦遭投綸那得任公子一釣

扶桑連六鼇

祝以幽耳劉

李可教受甫

人海記藏書之厄如吾鄉祝侍郎耳劉之萬古樓武原駱  
侍郎駿曾非流散則灰燼 杭州府志祝以幽字耳劉海  
甯人萬曆丙戌進士知隨州入爲兵部員外時日本攻朝  
鮮尙書石星力主招撫以幽曰日本勅賊朝鮮屬國今以  
朝鮮急而遣招撫是棄朝鮮也東藩折於日本勢必及我

朝議是之居鄉十六年起江西按察使尋擢應天府尹進  
士工部左侍郎致仕 松江府志李可教字受甫年十二  
能屬文趙貞齋遴爲贅壻年十八補諸生其先世儲書萬  
餘卷遭倭寇悉散佚可教多方訪購風鈔雪寫得還十五  
六校讎黜勘丹黃爛然子逢原逢申

委宛羽陵方茂如廣寒清暑殿中儲校讎但惜無臣向七略  
於今未有書 焦文憲竑

明詩綜小傳焦竑字弱侯上元人萬曆己丑賜進士第一  
授翰林修撰謫福甯州同知追諡文憲有漪園集 王士  
正說楛跋澹園山東日照人以軍籍居金陵 千頃堂書  
目簿錄類焦氏藏書目二卷焦竑 澹生堂藏書訓金陵

焦太史弱侯藏書兩樓五楹俱滿余所目覩而一一皆經  
校讎探討尤人所難 徵刻唐宋祕本書例前代藏書之  
富南中以焦澹園太史爲最 黃宗羲天一閣藏書記余  
在南中聞焦氏書欲賣急往訊之不受奇零之值二千金  
方得爲售主時馮鄴仙官南納言余以爲書歸鄴僂猶歸  
我也鄴仙大喜及余歸而不果後來聞亦散去 四庫提  
要國史經籍志六卷明焦竑撰蓋萬曆閒陳于陛議修國  
史引竑專領其事書未成而罷僅成此志其書叢鈔舊目  
無所考核最不足憑 國史經籍志自序宣德以來世際  
昇平篤念文雅廣寒清暑二殿及東西瓊島游觀所至悉  
置墳典委宛羽陵之有方之蔑如矣 天祿琳琅宋版演

繁露明版事類賦有澹園焦氏珍藏子子孫孫永保抱甕  
軒竹浪齋品四印 鐵琴銅劍樓書目六經正譌有弱侯  
漪南生二朱記

老去書城許策勳藍田誰識故將軍靈威唐述按羅徧更誦

佉羅梵字文 陳第季立 高儒

列朝詩傳陳第字季立連江人爲學官弟子教授清漳生  
徒雲集俞都督大猷召致幕下教以兵法爲游擊將軍督  
府私人行賈塞下侵冒互市金錢季立力持之督府恚將  
中以文法拂袖歸里角巾蕭寺徧閱佛藏聞焦弱侯老而  
好學裹糧來白門叩擊屢年弱侯歎服 世善堂書目題  
詞吾性無他嗜惟書是癖雖幸承世業頗有遺本然不足

以廣吾聞見也自少至老足跡遍天下遇書輒買若惟恐失故不擇善本亦不爭價直又在金陵焦太史宣州沈刺史家得未曾見書鈔而讀之積三四十餘年遂至萬有餘卷縱未敢云汗牛充棟然以資聞見備采擇足矣足矣今歲閒居西郊粗爲位置因成目錄得便查檢吾買書蓋以自娛子孫之讀不讀聽其自然至於守與不能守亦數有必至吾雖不聽之其可得耶萬曆丙辰溫麻山農誌 靜志居詩話余游閩林秀才侗持第後人所輯世善堂書目求售鐙下閱之見唐五代遺書琳琅滿目如披靈威唐述之藏多平生所未見不覺狂喜秀才許至連江代購踰年得報書則已散佚徒有惋惜而已 鮑以文世善堂書目

跋明萬曆閒連江陳第手自編定子孫時時增益藏弄二百餘年後嗣不復能守乾隆初年錢塘趙谷林齋多金往購則已散佚無遺矣目錄一冊余從趙氏得之斷種祕冊約三百餘于按其目求之積四十一年無所得則當時散落誠可惜也 居易錄涿州高儒武弁也家多藏書有百川書目 徵刻唐宋祕本書目高儒百川書志二十卷涿州人志其家藏書如晁公武之例

側聞江上李如一意氣性情殊不羣覓得異書頻下拜刊編

齋翰盡歸君

李如一貫之

姪忠毅應昇

錢謙益李貫之先生墓誌銘江陰李君諱鶴狎字如一後以字行字貫之家世力耕給公上其餘悉以購書授閱本

訪逸典藏弄刊編鬻翰老而食貧指其藏書曰富猗鄭矣其讀書也闕必補譌必正同異必讎勘病不輟業衰不息勞倣宋晁氏尤氏書目自爲詮次發凡起例井如也天啓中羣小附椽人亂政繆宮允昌期妹之夫也御史應昇弟子也相繼械繫君執應昇手曰勉之李氏有人矣君祖戒庵府君諱翊以儒有聞翊生復菴府君諱果用孫應昇死忠贈太僕卿君之父也君以崇禎庚午卒享年七十有四子奕茂孫男五人良知成之及功遴之挺之銘曰江陰東原赤岸里有明碩儒葬于此 又李貫之七十序貫之橫經藉書朱黃錯互虞監之親鈔杜侯之手跋充棟宇而溢機杼江以南豔稱之余與貫之皆有好書之癖每從借書

未嘗不倒皮相付也 又草莽私乘跋江上李如一性情意氣可敬可愛見圖籍則破產以收獲異書則焚香肅拜遇祕冊必貽書相問有求假必朝發夕至 池北偶談南唐書今止傳陸游馬令二本胡恢書久不傳惟江陰赤岸李氏有之李卽忠毅公應昇之叔忘其名矣昌熾案卽貫之先生也實爲忠毅之伯父余見其得月樓書目又有南唐錄十卷徐洪撰攷通志藝文略江南錄十卷徐鉉湯悅等撰記江南李氏之事疑卽此書而鉉誤爲洪也又有周淙臨安志十五卷足本宋敏求河南志二十卷李宗諤蘇州圖經六卷趙抃成都古今記三十卷皆世所不傳之本明史李應昇傳字仲達江陰人萬曆四十四年進士福

建道監察御史以劾魏忠賢削籍李實劾周起元疏入應  
昇名逮下詔獄酷掠斃之崇禎時贈太僕卿福王時追諡  
忠毅著有落落齋集 天祿琳琅大戴禮記明李應昇藏  
本有江陰赤岸李氏落落齋藏書記方印 梨洲思舊錄  
李孫之字膚公江陰忠毅公之子好讀書錢牧齋嘗謂江  
陰李氏家多殘本膚公無子然所著三朝野記足以傳矣  
魏叔子落落齋記李忠毅公有賢子曰膚公當國變棄  
諸生性疏嬾不治事而孺好學以詩文自娛入其齋書帙  
縱橫凝塵滿席 昌熾案士禮居題跋寶晉英光集爲戒  
庵老人李詔藏書據錢受之所作墓志卽貫之先生祖也  
惟詔作翊江陰縣志亦作詔

